



29. april 2025

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

Naalakkersuisunut apeqqutit:

1. Naalakkersuisunut pilersaaruteqarpat, Kitsissunnguani taassumalu eqqaani qeqertani Angissani, Innarsuatsaani, Niaqornami Saattuarsunnilu upernaakkut sikuernerata nalaani, ukiut tamaasa, teriannianik nungusaasoqartarnissaanik suliniuteqarniarnissaminnut, assersuutigalugu aaqqissuussaasumik piniarnermut nakkutilliisut tamaaniittut Pinngortitalerivillu suleqatigiissinnerisigut?

(Inatsisartunut ilaasortaq Lars Poulsen, Siumut)

Tunngavilersuut:

Qeqertarsuup Tunuani Kitsissunnguani taassumalu eqqani qeqertani Angissani il.il. imeqqutaallat manniinik katersisoqaqqusaanngilaq. Ukiorpasuarini tamanna kalaallit tamaani najugaqartut inuusaasiannut atuusimasoq, manniararniartarneq, ukiuni kingullerni inerteqqutaalersimavoq, nunat tamalaat akornanni isumaqatigiissutit pissutigalugit.

Annertuallaartumik manniararniartoqartarnera pisuutinneqarpoq imeqqutaallat ikilisimanerannut. Eqqarsaatigineqartariaqarporli aamma inuit manniararniartarnerat kisiat pisuutinneqarsinnaanngimmat, tassami sikusarnera pissutigalugu qeqertani terianniat ukiut ilaanni amerlisarnerisigut imeqqutaallat mannii annertuumik nungusarneqartarput. Tamanna erseqqissumik aamma Pinngortitaleriffiup 2018-imi nalunaarusiaani ersepoq, teriannissat qeqertani arlalinni piaqqisalersimasut aamma amerlanerulersimassasut, tamannalu timmissat amerlassusaanut sunniuteqartoq.

Qeqertarsuup Tunuani Kitsissunnguit tamatumalu eqqaani qeqertat (Angissat, Innarsuatsaat, Niaqornaq aamma Saattuarsuit) imeqqutaallat piaqqiffinnaaraat.

Imeqqutaallat manniisa katersorneqarnissaat maanna inerteqqutaavoq, pissutigalugu sumiiffimmi timmissat amerlassusaat nunarsuarini sumiiffimmilu pingaarteqartuusoq nalilerneqarmat. Sumiiffimmi eqqissisimatitaasunik timmissanik assigiinngitsunik peqarpoq, taakkunannga imeqqutaallat pingaarnertut isigineqarlutik. Taamaattumik sumiiffik maanna aamma timmissanik



illersuiffissatut toqqarneqarsimavoq (Important Bird Area, BirdLife International) aamma RAMSAR malillugu ingerlatsivissatut. Tamatuma saniatigut sumiiffik 2008-mi immikkut illersorneqartussatut aalajangersarneqarpoq, taannalu Namminersorlutik Oqartussat nalunaarutaat nr. 11, 2017-meersoq naapertorlugu ingerlanneqarpoq.

Apeqqutigineqartut ullut suliffiusut qulit iluanni akeqquneqarput.